



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

15. Kalenderwoche – ab 09. April 2011

Dobboldor Oba

Ja, isch bin jezde dobblid Oba! Seid baar Daachn! Odor zweefachor Oba! Jednfalls - dobblid häld
bessor! Un außordähm brauchn mir ja in Deuschland frisches Bluhd! Nachwuchs! De
Demoschgobie muss doch widdor bosedief wern, wenn mir nisch ausschdärm wolln. Un dähm
Islahm kenn mir am besdn mid eischne Enkl schdobbn! Nähmlisch!

Un dor erschde Enkl war mir ja werglisch schon sähr guhd geradn. E Brachdschdigg! Dähr is nu
jezdde schon drei Jahre ald un sachd rischdisch Oba zu mir. E sähr indelligendes Gerlschn.
Niedlisch sobiso! Sähr wissensdursdisch un mobil - ehm ganz dor Oba!

Wobei... wennor manschma boggn dud, dudor misch e bißl an meine Gudste erinnorn!

Abor sonsd... wie gesachd - ganz dor Oba middorlischorseids! Un dähr bin isch!

Wobei isch jezde nisch die Rolle von meinor Dochdor un vom Schwieschorsohn runnorschbieln
will... nee, die ham nadiehrlich ooch een gewissn Andeel am Gelingen von meim erschdn Enkl!
Das will isch nisch leuschnen! Abor wenn isch nisch gewähnsn sein däde, dann däds meine Dochdor
ja gahr nisch gähm! Un dann hädde dor Schwieschorsohn nisch meine Dochdor heiradn kenn! Un
dann däds mein erschdn Enkl nisch gähm! Un so is das nu ooch bei meim zweedn Enkl! Ohne
misch wär nischd geloofn!

Un mei zweedor Enkl is weiblich! Ja, e Mäd! Nee, werglisch - das is ganz wunschgemäß geloofn!
Erschd e Junge, dann das Mäd! Dähr kann nu e ganzes Lähm lang off seine jingore Schwesdor

offbassn, damid die keen Bleedsinn machn dud. Das dud misch doch widdor sähr erleischdorn, dass da außor mir noch eenor da is, dähr se beschidzn dun kann. Wensch das zarde kleene Wähns so vor Oochn hab... so e ganz kleens Mädl...!

Meine Gudste soll ooch ma so kleen un zard gewähns sein - als kleenes Mädl. Abor das muss schon sähr lange hähr sein. Villeischd sogahr schon vor dor Geburd! Soweid isch misch erinnorn kann... jednfalls de ledzdn fuffzn Jahre... zard? Nee, nisch dass isch wissde!

Abor mei neuor Enkl... - also, Enkelin! - is widdor so ganz kleen un neu, dass morsch kaum gloom kann! Nach wähm se komm dud, is nach die baar Daache, die se off dor Weld is, noch nisch rischdisch zu sähn. Abor wo isch se gesähn hab, da laach se so ganz friedlich offm Bauch von meinor Dochdor... Oochn zu un had geschlafn. Da hadse misch doch schdarg an misch erinnord, wenn isch so offm Sofa liesch un vor misch hin deesn du... - ja, de Schangsn, dass nach mir komm dud, schdehn so gesähn nisch schleschd!

Wobei... wensch in dähn Schbieschl gugge... se is ja wie gesachd e Mädl... - villeischd däds doch bessor sein, se dud nisch nach mir komm! Jednfalls vom Äußorlischn hähr! Was de innoren Währde bedreffn dud... - da kannse bloß blus machn, wenn se nach mir komm däde! Doi, doi, doi!

Eduard Sachsenmeyer